



文庫 17
W173
6

昭和六十年二月一日
主政呈吉慶氏寄贈

010185193484

夜航詩話卷之六

伊勢津阪孝綽君裕著

男達有功校

程伊川曰、凡人家法須月爲一會以合族古人有花
樹韋家宗會法可取也。宗會法今不傳然觀岑嘉州
韋員外家花樹歌其盛可想見矣。如崔敏童兄弟宴
城東莊蓋亦是也。清袁倉山致仕居隨園每至春日
花盛家中輪流置酒爲太夫人壽太夫人亦設席作
答歲以爲例倉山有句云高堂戒我無他出阿母明
朝作主人蓋實事也此誠孝子至行若其力不能爲

宗會亦須做是以致父母之歡曾子所謂推牛而祭墓不若雞豚逮親存庶幾乎他日少風木之憾矣始之非難善終爲難朝華夕萎雖美奚貴歲寒後凋明德維馨蓋夫善終罔不在初傳曰進銳者退必速此乃其戒也漢文帝還千里馬而與之道路費惜中人十家之產遂不作露臺事詞醞藉自無圭角綽有餘裕文帝之器大哉是故錢朽粟腐猶衣弋綵宮室車騎無所增益穀儉自持不敢滿假終始如一可謂歲寒之松矣晉武帝踐祚焚雉頭裘於殿前以儉率

天下既而及吳平侈縱日甚後宮數千常乘羊車幸之與群臣語未嘗有經國遠謀外患除而內憂殷釀成五胡大禍亂唐明皇即位亦焚珠玉錦綉於殿前示朴爲天下先然一觀帑藏充牋則奢靡荒淫糞土金帛勤政務本之樓徒爲虛設非復前日開元天子妃子肥而天下瘠漁陽鼙鼓動地來此皆雖矯勉於初政而怠忽於末路難乎有恒矣蓋志欲既滿侈心便生遂流連荒亡徃不知返換骨脫胎若兩截人然可謂朝華之草耳大凡激而行者未必不有進銳退

速之患也。觀夫牛乎逸而走一躍如失然。已幾四蹄忽廢不能復行。若彼二主者豈非牛走哉。清乾隆大爺嘗作有初行。余得而讀之。寔知其爲令主。其詞曰：君不見晉武嘗焚雉頭裘。平吳還駕羊車遊。又不見明皇珠玉焚前殿。太真寵盛長夜宴。人心靡不有厭。初幾見歷久常不渝。當時焚寶博虛譽。誰知慾熑翻焚軀漢文郤。馬輕千里崇尚節儉。輝青史不聞號。令付炎官祇覺中心淡如水。在潛邸時賦此自戒。乃克慎終如始。今在御垂六十年。未嘗聞其有悖德。

也書曰：慎厥终惟其始於戲信矣哉。

明景泰帝奢靡無度。嘗爲銀豆等擲於地。令內侍爭拾爲鬢笑。編修楊守陳作銀豆謠曰：尚方承詔出九重。冶銀爲豆驅良工。顆顆勻圓奪天巧。朱函進入蓬萊宮。御手親將十餘把。琅琅亂灑金階下。萬顆珠璣走玉盤。一天雨雹敲鴛瓦。中官跪拾多盈袖。金璫半墮羅裳縷。贏得天顏一笑懽。拜賜歸來坐。清晝聞知昨日六宮中。翠娥紅袖承春風。黃金作豆競拾得。羊車不至愁烟空。別有銀壺薄如葉。并刀剪碎盈丹匣。

也隨銀豆灑金階滿地春風飛玉蝶君不見民餐木皮和草根夢想豆食如八珍官倉有米無銀糴操瓢盡作溝中瘠明主由來愛一嚙安邦只在恤窮民願將銀豆三千斛活取枯骸百萬人長歌之哀甚於痛哭爲人君者讀之不猛省匪人矣

宋人李衡云讀書須是識字此言學問之要訣也苟不識字懵於文義而讀書求解如闇室索物其可得乎故爲學先務在識字通文義不然錯亂經旨是非謬於聖人豈容忽諸蓋識字莫善於詩詩雖末技使

小子先通其解乃馴致學通經義之階梯也夫古經文簡而理奧豈可一蹴而至焉乎乃詩且未能解而直事經義者何異不緣梯階而以求躋堂樓也朱子嘗言看詩義理外更好看他文章此謂毛詩然今之詩猶古之詩故予之教人以詩爲入門之路童生頗媢佔畢輒驅而之詩自然習於文字資學業多矣是方便捷徑因技而進乎道亦德充之符也或譏爲倒行逆施迂儒腐論閼殺人才世多讀書而不識字者不獨道學先生皆坐此故也

唐山杜鵑暮春盛啼旅客聞之不勝悲傷以其呼不如歸故攬鄉情云此間至夏始聞國歌者流與鶯並賞特喜聽初聲詠以向人訖之按顧況山中作幽人自愛山中宿况在葛洪丹井西庭前有箇長松樹夜半子規來上啼僧齊已林下偶作花在月明胡蝶夢雨餘山綠杜鵑啼朱文公崇壽客舍夜聞子規空山初夜子規鳴靜對琴書百慮清喚得形神兩超越不知底是斷腸聲戴景明詩預識今年好鵑啼枕上聽許月卿詩要知來日清明節請聽鵑鳴第一聲明人

徐威詩山長空寄鯉春盡好聞鵑清人高步瀛詩客來未慣驚離燕人到無愁愛杜鵑則彼方亦樂而賞之也但在旅中厭之耳

無題詩集載僧蓮禪杜鵑詩頷聯云鶯子巢中春刷翅兔花牆外曉傳聲此在當時殊爲絕妙隨軍茶花古稱芳宜花安澹泊湖亭涉筆歷舉故實水綿花稱兔花亦可備一典故

有傴彊好異者喜用僻典下奇字銜博以驚人余嘗指摘之責其杜撰輒言見東坡集或稱楊誠齋語余

曰二公全集吾能譜之絕無斯語若有別集乎請與寓目焉其人語塞赧顏而退蓋腹中空洞而強欲出奇小人窮斯濫矣又有用笛簞字者試詰其義答曰取諸放翁詩鈔其義未考姑妄用之余哂曰放翁本集作竹簞鈔本作笛譕耳君子闕疑慎言其餘乃不知而妄作自欺欺人耶若以後再之直於尻骨上施一大灸矣吁詞林多怪不得不燃犀也追考放翁咏
賦合風漪之句似是謂
竇蓋竇亦謂之簞也

周櫟園論詩云學古人者只可與之夢中神合不可

使其白畫現形旨哉言乎今世學宋詩者不能得其佳處而徒偏效其顰牛鬼蛇神白日橫行

徐而菴云今人詩要見好所以工于字句之間古人詩不要見好所以妙于篇章之外洵知言也今之追逐時好者不辨體裁不了章法以好行小慧爲能事徒爭巧於五字七字之間琢鏤湊砌抽黃媿白合作何由而得哉以此博一日之名則可而遂欲傳後世耶

黃山谷詩苦於貪對偶而不脫灑好組織故事不勝

刻畫之痕尤逞奇自喜顧影裴徊銜耀太甚故格雖高而無滋味往往晦僻難曉世人不解事喜其律刻而切乃所以爲弊也魏道輔隱居詩話山谷喜作詩得名好用南朝人語專求古人未使之奇字綴葺而成詩自以爲工其實所見之狹也故句雖新奇而氣乏渾厚吾嘗作詩題編後云端求古人遺琢抉手不停方其得機羽往往失鵬鯨蓋謂是也西清詩話山谷詩所恨務高一似參曹洞下禪尚墮在玄妙窟裏漁隱詩話山谷詩酷學少陵雄健太過遂流而入于

險怪要其病在太著意欲道古今人所未道語耳當時既有是論而至今與坡公並稱何耶

杜詩且看欲盡花經眼莫厭傷多酒入唇虛字斡旋之妙圓轉如珠走盤然學者好倣此則不勝破碎矣蓋詩用虛字猶構舍之用楣子也若不善用動搖欲頽豈可浪用乎

自漢以女妻匈奴而後世習爲例常結昏戎狄不以爲恥如李唐之時世世嫁公主於虜酋尤可哀也昔齊景公一諸侯也畏吳以女女之猶涕泣遣之今以

天子之尊廼與異類通婚殆無人倫之理矣夫庶人求配偶猶各以其倫良民之女不敢嫁匪類况王姬公族而棄之外夷何其忍也鍾伯敬唐詩歸論崔湜奉和金城公主適西蕃應制之作云如此醜事何勞群臣作詩應制唐時君臣廉恥意氣盡矣每讀之氣塞湜詩粗能回護中寓傷諷得詩人之意然終不如勿作耳詩之爲用至此亦不幸矣蓋至明氏一掃舊弊故得立此論也

王弇州藝苑卮言云邊庭實詩自聞秋雨聲不種芭

蕉樹于鱗詩刪收之然芭蕉豈可言樹乎若作自憐秋雨滴不復種芭蕉可也按佛經菩薩如實知行如芭蕉樹宋謝翱詩碁局雨生苔蘚文袈裟晴掛芭蕉樹是芭蕉可言樹也又雜譬諭經庭中有蒲萄樹韓文公詩偶坐藤樹下金人李元翼詩牡丹樹下影堂前此類亦皆可言樹也蓮亦稱樹北齊時童謠千金買藥園中有芙蓉樹破家不分明蓮子隨他去楊誠齋曉看芙蓉半紅半白花都間非短非長樹斬齊是也然好奇喜用非也

杜詩崔氏東山草堂用真韻內押并字蓋出韻之失
當時諸家往往有之皆一時趁筆之誤耳隨園詩話
云余祝人詩七虞內誤用餘字意欲改之後見唐人
律詩通韻極多因歷舉唐詩以爲一法予竟不以爲
然也夫通韻古詩所用唐人韻法極嚴何敢於近體
用古韻此猶王右軍書帖多誤字豈可以爲典要乎
後學以是爲口實效尤文過不思之甚也

吳融詩一夜陰風度平明顎氣交鄭谷詩武德門前
顎氣新雪融駕瓦土膏春是顎氣冬春亦可言也梅

雨梅陰亦於春時言之柳宗元詩梅實迎時雨蒼茫
值曉春鄭谷詩野綠梅陰重江春浪勢麤蓋陸佃埤
雅所謂迎梅也

許渾題峽山寺鷺巢橫卧柳猿飲倒垂藤語誠工矣
然驚非高木不巢是求奇巧而不遑考其實耳改作
棲字則可也

黃山谷云歐陽文忠公極賞林和靖疏影橫斜水清
淺暗香浮動月黃昏之句而不知和靖別有咏梅一
聯云雪後園林纔半樹水邊籬落忽橫枝似勝前句

不知文忠何緣弃此而賞彼文章大槩亦如女色好惡只繫於人吁是真醜西施而艷嫫母不意山谷乃爾因記王漁洋五代詩話載唐江爲詩竹影橫斜水清淺桂香浮動月黃昏和靖改二字爲疎影暗香以詠梅遂成千古絕調余初讀之以爲和靖亦太橫然氣格乃過本句不啻青出於藍殆是神來之筆不謂之剽可也

唐許棠宣宗時人有送金吾侍御奉使日東詩曰還鄉兼作使到日益榮親向化雖多國如公有幾人孤

山無返照積水合蒼旻膝下知難住金章已繫身此亦晁卿之類仕彼爲侍御者又張喬送賓貢金夷吾奉使歸本國曰渡海登仙籍還家備漢儀孤舟無岸泊萬里有星隨積水浮魂夢流年半別離東風未迴日音信杳難期此恐或是同人然竟不可知其爲何人也

彥九郎還日本作詩餞之座間走筆甚不工也萍踪兩度到中華歸國憑將涉歷誇劍佩丁年朝帝宸星辰午夜拂仙槎驪歌送別三年客鯨海遄征萬里家

此行倘有重來便煩折琅玕一采花正德七年壬辰仲夏望日姑蘇唐寅書此詩真蹟儼然江戶樽屋氏珍藏彥九郎莫知其爲何人以頸聯所稱觀之似是士人奉使者然無姓氏豈亦商客之豪者歟

送居士五良大夫歸日本敬將玉帛觀天顏回首扶桑杳渺間舡泊古鄞三佛地杯傳新酒四明山梅黃細雨江頭別帆引清風海上還明到賢王應有問八方職貢溢朝班大明正德癸酉夏六月朔四明李春亭此詩藏於伊勢丹生邑神宮寺五良大夫松阪陶

工永正年間西渡久寓南京舶來陶器有書五良大輔吳祥瑞造者即在彼所作也春亭不知何人詩雖不工亦奇珍也

白香山蘓州詩綠浪東西南北水紅欄四百八十橋直是我浪華光景陸放翁登擬峴臺作紫廻水抱中和氣平遠山如醞藉人宛然平安城風致

李大白鳳凰臺詩三山半落青天外二水中分白鷺洲或作一水於義爲穩而氣格便劣耳明人郭登墮頂詩不知眼界高多少地下行人似凍蠅與眼花落

井水底眠一樣字法若作地上則不稱矣是必至語勢自然字法也

七言律絕發句以散句起必須押韻懦慢之輩喜從省略疎宕失體甚不可也且如絕句僅三韻耳而起手不能用韻何其駕鈍窘縮耶余七言發句除對起外一生不作不引韻起者亦爲學者慎之也
摯虞論詩賦四過假象太過則與類相遠命辭過壯則與事相違辨言過理則與義相失麗靡過美則與情相悖此誠金科玉條學者可串而佩之

余前既論古樂府不可爲矣近得明人于無垢說曰唐人不爲古樂府是知古樂府也辭聲相雜既無從辨音節未會又難于歌故不爲爾然不效其體而時假其名以達所欲出斯慕古而託焉者乎近世一二名家至乃逐句形模以追遺響則唐人所吐弃矣夫唐人能爲而不爲今人奈何不能爲而爲也無垢名慎行隆慶萬曆間名賢當時李王之焰尤熾故厭薄之而言也

薛能屢譏諸葛武侯非王佐之才遊嘉州後溪云山

屐經過滿徑縱隔溪遙見夕陽春當時諸葛成何事
只合終身作卧龍題籌筆驛云葛相終宜馬革還未
開天意便開山生欺仲達徒增氣死見王陽合厚顏
流運有功終是擾陰符多術得非姦當初若欲酬三
顧何不無爲似有鰥又云焚却蜀書宜不讀武侯無
可律余身真是蜉蝣撼大樹何其不自知量之甚薛
方貴時秦宗權爲之吏嘗坐法笞背薛口唱云素脊
鳴秋杖烏韁響暮廳乃命決後宗權起兵首捕薛令
舉前詩因續之云又飛三尺雪白日落文星遂加害

其視武侯嘗罪李平免官及侯薨平慟哭發病死奚
翅霄壤之隔也哉

對偶語一有所本一無來處則爲偏枯猶病痲者半
身不遂也老杜端午賜衣詩自天題處濕當暑着來
清自天用易語因對以鄉黨篇字鳳林戈未止魚海
路常難上句翻用止戈爲武故以行路難對之山谷
咏猩猩毛筆平生幾納履身後五車書平生二字見
憲問篇身後用晉張翰語東坡雪詩漁蓑句好真堪
畫柳絮才高不道鹽下三字亦皆有來歷見良工苦

心一字不苟作。詩用事當如是。抨停也。如賈浪仙過橋分野色。移石動雲根。^上人多喜誦之。韻句誠佳。此必先得者。惜野色貌續不免偏枯耳。嘗與清公績論詩。及之。公績曰。詩人多以雲根爲石。以雲觸石而生也。然張協詩云。雲根臨八極。雨足灑四溟。則直指雲言也。賈詩亦然。非用典也。余曰。即非用典。雲根有力。野色平平。終不免偏枯爾。公績曰。論誠精矣。抑責於人。終無已夫。余曰。詩以律稱。不容不嚴。公績哂曰。卿可謂詩家高君矣。

羞將短髮還吹帽。^七笑倩傍人爲正冠。人只知吹帽爲孟嘉事。而不知正冠亦用家語。子路語伯仲之間見伊呂。指揮若定。失蕭曹。伯仲之間。取諸典論。因用陳平傳。天下指揮則定。對之寵光蕙葉添多碧。點注桃花舒小紅。寵光詩小雅語。點注見鍾會孔雀賦。五更鼓角聲悲壯。三更星河影動搖。聲悲壯本于禰衡。漁陽撾故星。動搖亦取諸漢武故事。正得力兩相稱詩律之細如此。真無一字無來歷。杜詩豈可輕讀乎哉。盍簪喧檻馬。列炬散林鴉。途窮那免哭。身老不禁愁。

此並下句偏枯偶失之也。邵註引孔仲年老失意不
禁愁恨，僞蘓所捏造耳。如子雲清自守，今日起爲官
用，借對法假雲對日，兩句一意，故不病偏枯，非後人
所敢學也。

京師五山禪徒好爲諧詩聯句，尤要的對古言必以
古言俗語，必以俗語聖經佛典，皆然。蓋試才學也。如
月是無量壽山夫不動尊夢得劉夢得寤生鄭寤生
櫻東山地主梅北野天神箸箱前住扇舟板再來橋
亦可以解頤矣。

或對天南星是藥，以池北月非茶。人問池北月何物
答曰：吾亦不知定非茶耳。是與徒然草所謂白盂瑠
璃一對雅諱。又米元章嘗賦曰：飯白雲留子茶甘露。
有兄人不省露兄叩之，乃曰：只是甘露哥哥耳，亦可
笑也。

山谷湯婆詩天明更傾瀉，頰面有餘燠以煖足者頰
面齷齪窮措大哉。履雖鮮不如于首冠雖敝不以苴
履君子於言可苟焉而已乎。

傾城本不祥語猶言亾國李延年歌一顧傾人城再

顧傾人國寧不知傾城與傾國佳人難再得後世遂爲美人通稱如梁劉緩詩題咏名士悅傾城是也故李白在明皇前稱貴妃曰名花傾國兩相歡若講本義唐突殊甚蓋猶今世城門以敵陣名自稱不嫌其爲惡語也南門稱追手謂下攻破其軍追入于城上也後門稱搦手謂下要其遁逃擒中縛于此上也

杜牧詩誰家洛浦神十四五來人羅隱詩中和節後奉瓊瑰坐讀行吟數月來來言已來猶云許也杜光庭麻姑洞記中有約五尺以來高六寸以來方二丈以來闊一尺六寸以來相去三里以來等文蓋當時

語也揚萬里好用此字清愁舊是天來遠竹扉日影針來大西湖瘦得盆來大道是荒城斗來大放出釣臺寸來許諸餘不遑枝舉范成大詩新秋病骨頓成衰不度溪橋半月來本羅隱句也

漢宣帝曰俗儒不達時宜賈太傳曰俗吏不識大體此二者古今之通弊王粲儒吏論所云刀筆之吏皆服雅訓竹帛之儒亦通文法噫其難矣抑世有以俗儒爲俗吏者其弊更何如哉太白詩曰魯叟談五經白髮死章句問以經濟策茫如墜雲霧此尤講學家

之通患也。至其甚者如桃源中人不知有漢安問晉魏。況於資治通鑑文獻通考等政教典禮之書。真混然途之人乃有覲面目傲然夸張開口便說治國平天下說理則喙三尺施用則手五斤直可一棒打殺與狗子喫耳。

趙昌父曰。古人以學爲詩。今人以詩爲學。羅景綸曰。近時講性理者。舍六經而觀語錄。是舍禰而宗兄也。予見今之學者。不趨彼則陷于此矣。然溺於詩者。猶可援也。頭巾氣習病入膏肓。不可救藥已。

意行。蓋取意恣行無所拘局也。劉禹錫蠻子歌腰斧上高山。意行無舊路。是也。東坡策杖無道路。直造意所便。放翁隨意東西不問。途此即意行之義。王安石意行却得前年路。看盡梅花看竹來。翻案劉句也。宋史蕭注傳。王安石意行直前。敢當天下大事。其義尤可見也。

語辭文字不易押韻。王維幽尋得此地。詎有一人曾王昌齡借問白頭翁。垂綸幾年也。韓愈隔絕門庭邃。擣排陞級纔。韋應物亭午一來尋院幽。僧亦獨蘊軾。

欲買柯氏林茲計待君必又苦熱誠知處處皆王安石進律朝章古疏恩物議僉張耒平生千金質戒懼敢忘暫陳造臚鴨久欲忘食蛙近亦稍黃庭堅夏扇日在搖行樂亦云聊蔡松年青鏡髮蕭蕭及此霜雪未皆押得穩妥可則也

古詩轉韻初無定式或二語一轉或四語一轉或數十語乃轉韻數多少參差隨宜取便自在也然非爲韻窮而轉其處意思必轉換是爲更端轉機也故讀者辨解數須照韻今截也若作古詩不知斯訣意不

轉而轉韻貽笑大方矣

歌行換韻平仄互取參錯成章音節抑揚得宜蓋正調也然劉廷芝公子行第十一句自麻轉陽代悲白頭翁第十五句自東轉先次又轉支張若虛春江花月夜第二十一句自尤轉灰次轉文又轉麻岑參送顏真卿第九句自麻轉文少陵曹將軍畫馬引第十三句自微轉麻丹青引第五句自元轉文又盧照隣長安古意有自齊轉文駱賓王帝京篇有自微轉文自支轉麻此姑就于鱗唐詩選舉之自餘不遑僂指

不舟詩言卷六

至如木蘭歌凡韻六轉皆以平韻承接其不必拘可見已有一槩泥者故爲拈出之

五言古詩貴一韻到底篇長不可轉換以通韻自在也然亦有逐段轉韻者如蔡邕飲馬長城窟行齊武帝西洲曲蓋以音節抑揚爲妙也又有末稍忽換韻收住者一滾而出戛然而止奇警活脫頓挫尤妙如魏文帝西北有浮雲上八句泰韻末二句云棄置勿復陳客子常畏人陳思王轉蓬離本根上十句東韻未二句云去去莫復道沈憂令人老是也

同訓字見一聯中李白疇昔不識君知君好賢才杜甫方丈渾連水天台總映雲王維懸知倚門望遙識老萊衣緣底名愚谷都由愚所成錢起不奈扁舟去其如決計何韓愈縱橫乍依行爛漫忽無次李端飲馬逢黃菊離家值白雲每見先鳴早常驚後進多崔峒曾見長洲苑嘗聞大雅篇朱慶餘資身唯藥草教子但詩書許渾務閑唯印吏公退只碁僧皇甫冉圖書唯藥篋飲食止藜羹劉禹錫宦達翻思退名高却不誇白居易是日孤舟客此地亦離群司空署仙方

當見重消疾本應便盧綸恐看新鬢色怯問故人名
杜牧夜闌終耿耿明發竟遲遲喻亮竟蒙今玉石終
不離塵埃僧齊已便應過洛水即未上嵩峰劉廷芝
但看古來歌舞地唯有黃昏鳥雀悲杜甫客來但知
留一醉盤中祇有水精鹽即從巴峽穿巫峽便下襄
陽向洛陽白居易目昏思寢即安眠足軟妨行便坐
禪豈唯不得清文力但恐空傳冗吏名鬚毛遇病雙
如雪心緒逢秋一似灰許渾一官唯買葢公室但得
身閑日月長劉兼蜀箋都有三千幅總寫離情寄孟

光張籍復恐匆匆說不盡行人臨發又開封戴叔倫
欲寄遠書還不敢卻愁驚動故鄉人姚合玉佩聲微
班始定金函光動按初來羅鄴不愁世上無人識唯
怕村中沒酒沽王建知時每笑論兵法識勢還輕立
戰功如猶尚尤最爲作如似多足能解等不必舉焉
白詩輩血屏除唯對酒歌鐘放散只留琴更無俗物
當入眼但有泉聲洗我心兩聯中唯只但三字連用
各有所當子細玩味其義可見也

瀛奎律髓評李商隱隋宮詞沈香甲煎爲庭燎玉液

瓊酥作壽杯云以爲字對作字作即是爲也雍陶秋園詩晚花開爲雨殘果落因風云因即是爲兩字相犯也姚合山中詩酒用林花釀茶將野水煎云用字將字元一般不可爲法不得已則然隨園詩話亦嫌如字與似字犯重云竹垞爲放翁摘出百餘句後人當以爲戒此雖作法過嚴然凡是類非不得已所宜避也如知對覺疑對怪亦不若省也

杜詩斬新花繢未應飛白詩斬新蘿徑合洛浦禪師

偈斬新日月特地乾坤斬字形容其新言斬焉忽新也遯齋詩話云在可解不可解之間夫明晰如是何不可解之有又宋詩西風一紙征鴻信剗地催人辨夾衣無端又被東風惡剗地多添一夜寒秋成苦作兼旬雨剗地街頭米價高剗削也蓋匡嶽削之則勢斗峻矣因爲忽驟之辭有依然驚駭之意蕉中詩語解以爲追辭未盡

詩家每用爛漫字而字書無明解蓋物夥盛之貌不唯稱花之歷亂霞之灼爍凡事淋漓酣足之狀皆謂之爛漫譯弭地堅累又稱婆娑紛綸之貌譯地羅婆

累按古人使用之例可以會其意矣莊子在宥篇大德不同而性命爛漫矣列女傳桀造爛漫之樂上林賦麗靡爛漫于前謝眺聽歌賦乍連延以爛漫時頓挫而抑揚沈約郊居賦始則金石鏘鎔終以魚龍爛漫並雜亂之貌魯靈光殿賦流離爛漫散亂之意樂府前溪歌黃葛生爛漫誰能斷葛根繁茂之狀壽陽樂長淮何爛漫廣遠之勢要之皆夥盛意也陳子昂空濛微雨霽爛漫曉雲歸杜甫主人情爛漫持答翠琅玕衆雛爛漫睡喚起霑盤餐犬羊曾爛漫宮闈尚

蕭條歸期豈爛漫別意或感激定知相見日爛漫倒芳樽已撥形骸累真爲爛漫深爛漫通經術光芷刷羽儀如絲氣或上爛漫爲雲雨侵星驅之去爛漫任遠適李白自身世殊爛漫田園久蕪沒待取明朝酒醒罷與君爛漫尋春暉韓愈開筵交復舄爛漫倒家釀縱橫乍依行爛漫忽無次前低劃開闔爛漫堆衆皺離思春冰泮爛漫不可收近憐李杜無捨束爛漫長醉多文辭元稹芳遊春爛漫晴望月團圓飲荒情爛漫風棹樂爭擬同年同拜校書郎觸處潛行爛漫狂

有酒有酒方爛漫飲酣拔劍心眼亂白居易今朝餐
又飽爛漫移時睡假日無公事爛漫不能休六七年
前狂爛漫三千里外思襄廬甘從此後支離卧賴是
從前爛漫遊曾經爛漫三年着欲棄空箱似少恩郭
利貞爛漫唯愁曉周游不問家又作春風爛漫晴霜
晴爛漫東窓日一笑山坡又看梅村市醉後作未敢
羞空囊爛漫詩千章僧法常優游翻世界爛漫枕神
仙丁鶴年韶光淑氣逡巡退暑雨炎風爛漫來周永
言春愁爛漫來難遣午夢飄蕭去莫遮張以寧昇平

不復後庭曲睡起漁陽爛漫聽文徵明胸中爛漫富
丘壑信手塗抹皆天真王世貞興來爛漫揮毫罷且
復婆娑里社歸皆稱十分之勢淋漓酣足之狀也諸
集鷄本漫訛作熳今悉改正之于前說見

淮南子夏桀之時主闇晦而不明道爛漫而不脩王
褒洞簫賦悼恍爛漫亡耦失儔左思嬌女詞濃朱衍
丹唇黃吻爛漫赤愁康琴賦留連爛漫嘵噓終日張
協七命灑漫狼藉傾榦倒壑鮑昭詩生事本爛漫張
玉穀古詩賞析如灑之漫言繁多也余謂亦與爛漫

同猶言紛綸也

廻文體人名藥名等詩區區安排誠出苦心輕薄諸生術才所爲殆近兒戲苟爲人師號稱先生者作此伎倆不亦失體乎詩固遊戲耳然苟涉輕薄者不可不慎也

排律強作長篇亦輕薄術才夭閼剗藤耳孰能勉彊讀之區區苦心費力徒爲絮叨寃言何其不自惜耶如及百韻始於老杜然僅一首繼之者白樂天集中凡三首是乃大家伎倆後人倣顰不知量矣清人徐

增說唐詩以十二句爲排律正局故其選耑取六韻末載八韻僅一首耳雖頗偏見良有以也

正德辛卯韓使來聘也江戶學士就其館中唱和相競如萬玄岱三百九十韻室鳩巢二百二十韻豪吟鉅構可謂盛矣然究無益長語徒費紙耳

七言排律如杜白諸公亦不多見以其傷風趣也余戲目爲鯨魚羨海鯤膾苟知雅味者所不染指也余嘗誡人曰歌行中作長短句我輩未審音節不若且放教西人獨步偶見隨園詩話曰七古中長短句

尤不可輕作何也。古樂府音節無定而恰有定。恐康昆侖彈琴三分琵琶七分箏絃全無琴韻故也是西人猶然故只宜守正局耳。但短篇首二句若四句以五言起似有定格此或可擬然亦非老手不可也。

楊仲弘云詩要首尾相應多見人中間二聯儘有奇崛然全篇湊合如出二手便不成家數此一句一字必須着意聯合也。隨園云詩有有篇無句者通首清老一氣渾成恰無佳句令人傳誦有有句無篇者一首之中非無可傳之句而通體不稱難入作者之選

二者一文天分一文工夫必也有篇有句方稱名手此皆中今人之竅真詩律要訣也。蓋有句無篇者以鹵莽貌續也。如作律詩專於聯上著工夫至于起結不甚用力苟且湊合故一聯半章雖好然前後不稱則併其好者壞了殊可惜也。

余嘗言歷代之詩各有所長擇其善者可也何必一槩以世廢言元享已來明詩盛行宋詩則棄如糞土耳。近日專主張宋詩黃口兒皆趨彼幾令明人無處生活時風之所靡好尚無定如此不亦太甚乎隨園

詩話云楊龜山先生言當今祖宗之法不必今元祐與熙豐也國家但取其善者而行之可也予聞人論詩好爭唐宋必以先生此語曉之恰與鄙說合好而知其惡憎而知其美如明季王僞體及徐夜义袁波旬亦未可全棄也

宋詩專於風趣明詩主於氣格各有所宜取不可偏廢也學者依彼氣格而占此風趣便唐詩可庶幾矣余斷宋明之獄左右其祖以此

宋趙子固論書曰學唐不如學晉人皆能言之晉豈

易學學唐尚不失規矩學晉不從唐入多見其不知量也此言真善誘人矣學詩以盛唐爲準亦老生之常談不知而易言之耳初學宜從近人詩入則勞省而功倍然後盛唐可庶幾豈可一蹴而到耶余著續絕句類選所以爲初學指南也涉遠必自邇下學而上達又豈獨詩書然哉

古詩題目歌行引等本一曲爾見少陵作有同名異體者有同體異名者不必拘局也白石詩說放情曰歌體如行書曰行悲如蛩蟹曰吟使人思怨委曲盡

情曰曲序先後載始末曰引文體明辨猗裁遷抑以揚永言謂之歌步驟馳騁疏而不滯謂之行聲音雜比高下短長謂之曲述事始末先後有序謂之引吁嗟慨嘆悲憂沈思謂之吟此皆以臆言之安能如此判然曾敏行獨醒雜志云少陵古詩有歌行吟歎之異名每與能詩者求其別訖未嘗犁然于心也少陵其必有所祖述矣世豈無能別之者恨余之未遇也是昔賢既不明今人強求其別亦鑿空耳

同訓虛字疊用者杜甫自從失詞伯不復更論文至

今夢想仍猶在韓愈感激生膽勇從軍豈嘗曾皮日休嘯館大都偏得月醉鄉終竟不聞雷王貞白豈思封侯貴唯只待豐年陳師道後歸棲未定不但只昏鴉王維簾前春色應須惜陸龜蒙釣竿猶尚枕楓汀和凝麻尾尚猶龍字濕楊萬里今歲知何故秋陽爾許騎僧惠洪江南春思倍添增楊基旅懷蕭索豈堪勝如既已與俱將欲等文中數見詩不多用楊升菴曰今文語辭竭來聿來不知所始楚辭車既駕兮竭而歸不得見兮心傷悲舊註竭去也呂氏春

秋膠鬲見武王於鮒水曰西伯竭來無欺我也武王曰不子欺將伐殷也膠鬲曰竭至武王曰將以甲子日至註竭何也若然則竭之爲言盍也若以解楚辭則謂車既駕矣盍而歸乎以不得見而心傷悲也意尤婉至則今文所襲用竭來者亦謂盍來也非是發語之辭矣文選註劉向七言曰竭來歸耕永自疎顏延年秋胡妻詞曰高節難久淹竭來空復辭皆謂盍字通此說穿鑿牽強令人惑滋甚焉按古琴操曾子歸耕操竭來歸耕歷山盤兮以晏父母我心博兮張

衡思玄賦廻志竭來從玄謀獲我所求夫何思此與呂覽竭來不同竭訓爰發語之辭來到來也洪武正韻曰竭來猶聿來也詩家所用皆從此義楚辭及劉向顏延年並是也呂覽別自一義耳李涉有三竭來詩起句皆用斯語一曰釣魚竭來藥苗盛張協竭來戒不虞挺轡越飛岑陳子昂竭來高唐館悵望雲陽津張九齡竭來彭蠡澤載經敷淺原李白竭來遊閩荒捫蘿窮禹鑿李紳竭來遂遠志默默存天和吳筠竭來

從舊遊式保羨門計蘓軾竭來東觀弄丹墨聊借舊
史誅姦彊長陵竭來見大姊仲儒豈意逢將軍朱熹
竭來空老淚無地別輶車是其義可見也又張麟之
韻鏡序竭來當塗得歷陽所刊切韻心鑑蕉中詩語
解引之以爲猶向來謬矣

聯中有兩句一連流走直下者謂之流水對老杜好
用此法喜無多屋宇幸不礙雲山直愁騎馬滑故作
泛舟回所向無空闊真堪託死生花徑不曾緣客掃
蓬門今始爲君開竹葉於人既無兮菊花從此不須

開憶昨賜露門下省退朝擎出大明宮悵望千秋一
洒淚蕭條異代不同時但遣閭閻還揖讓敢論松竹
久荒蕪皆直述其事意脉一貫昔人所謂作文字如
寫家書者又羞將短髮還吹帽笑倩傍人爲正冠將
一事翻騰作兩句融化妙絕澗道餘寒歷冰雪石門
斜日到林邱倒裝而流水對法尤妙

飫梁肉之餘悅蔬茹之食酬酌醴之後賜清冷之漿
王子安滕王閣詩能領此意者序作長文寫景盡致
綺章繪句光彩眩人於是詩則短篇淡意令讀者爽

然坡公所謂厭飫芻豢反思螺蛤者也王阮亭評陳
卧子詞如香車金犢流連阡陌反令人思草頭一點
之露此亦爲作文字不知變化者言也因憶五代蜀
主王衍奢縱爇諸香晝夜不絕久而厭香更爇皂莢
以亂其氣良可笑也

作詩審於用事不可貌續偏枯余既詳言之於前矣
西清詩話載熙寧初張挾以二府初成作詩賀荆公
公和曰功謝蕭規慙漢第恩從隗始詫燕臺以示陸
農卿農卿曰蕭規曹隨高帝論功蕭何第一皆撫故

實請從隗始初無恩字公笑曰子善問也韓退之鬪
雞聯句感恩慙隗始若無據豈當對功字也乃知前
人以用事一句偏枯爲倒置眉目反易巾裳蓋謹之
如此又漁隱叢話宋子京落花詩將飛更作廻風舞
已落猶成半面妝議者或謂半面妝用宋元帝妃徐
氏事若廻風舞無出處則對偶偏枯不爲佳句殊不
知李賀詩云花臺欲暮春辭去落花起作廻風舞前
輩用事必有來處又精確如此誠可爲法也丹鉛錄
亦云少陵滕王亭詩春日鶯啼修竹裏仙家犬吠白

雲中修竹用梁孝王事犬吠雲中用淮南王事人皆知之矣但怪修竹本無鶯啼字也偶見孫綽蘭亭詩鶯啼吟修竹游鱗戲瀾濤乃知杜老用此也讀書不多未可輕議古人此皆至論精密爲後進合錄之吾邦中古尚昭明文選當時學者專意此書勸學院集飲或曰今日之會不問齒序乃以才高下爲席藤隆賴便直進居上頭諸人爭之隆賴曰文選三十卷四聲切韻有暗誦者邪身座乃應讓耳其通文選爲能事如是唐人亦然故少陵有熟精文選理之句李

德裕曰吾家不畜文選蓋惡其浮靡激反時俗而言也至宋尤其時諺云文選爛秀才半又云文選熟秀才緣東坡因罵文選曰小兒強作解事亦矯激之言也唐鄭爽嘗以文選教其子其兄曰何不教他讀孝經論語免學沈謝嘲風詠月汚人行止茲言誠有識矣如雨航雜錄所云唯文選是尚枕席沈醉其間而六經如甲乙簿者固鳴鼓而攻之可也然遂廢而不讀者亦不免於面牆爾

杜詩讀書破萬卷破猶過也公詩二月已破三月來

李義山新正未破剪刀冷亦皆訓過舊說識破萬卷之理或謂猶韋編三絕並非

李瀚蒙求協以韻語以便課誦蓋倣周興嗣千字文故全唐詩收爲詩類近世往往有續貂者徒倣其體裁而不知押韻殊可笑也

肥後本田正卿天才俊逸爲詩敏絕一揮數十篇人莫擗其鋒嘗遊長崎過佐賀學館諸生素聞其驕傲頗憎忌之試即席贈詩要和欲俟其成更又次韻仍請再和必令詞鋒利蓋皆具腹稿云生見幾領意便

卻贈各一首附次韻併示揮筆如飛略不構思叉手擊鉢風生雨集衆贍若自失謀折而罷於是延畫手三人曰嘉賓辱臨無以供興聊奏薄技敢請高詠蓋亦所預謀云生隨畫便題多多益辨畫漸奇僻題愈敏捷三人者不遑給生則綽有餘力矣既而舌戰鬪智詞辨注射務欲壓倒生機鋒捷給八面受敵游刃有餘生徒終不能克因詰曰有所取瀆不知許否貴藩儉制殊嚴如夫禪帶舉國必用所謂越中者蓋國初三齋公所創世俗故稱云竊惟蔽屣之具敢冒君

侯之稱爲之臣者不可不避未審易以何名若向他邦人將稱寡君禪乎生笑曰僕亦欲有請問憚唐突未敢世俗所謂肥前瘡多是卑賤所患然士大夫動或傳染即座中諸君亦有有其痕者世傳此瘡初自貴國始行故因其號遂爲名抑不知在內云何其稱諸異邦無乃曰敝邑瘡乎一座服其機警無復敢嘲謔者真曠世之奇才也惜風流自傲不事操修浪跡漂蕩屢變易姓名嘗在京師稱菊池某者即是也余見其詩儘有佳句今不知流落何所殆坎壈以歿矣

西清詩話載吳越王時宰相皮光業每以詩爲樂嘗得一聯云行人折柳和輕絮飛燕啣泥帶落花自負警策以示同僚衆爭嘆譽裴光約曰二句偏枯不爲工柳當有絮泥或無花歐公詩話稱此論乃得詩之膏肓矣又元厚之作王介甫再相麻世以爲工然未免偏枯其云忠氣貫日雖金石而爲開讒波誓天孰斧戕之敢關上句忠氣貫日則可以襯雖金石而爲關下句讒波誓天則於斧戕了無干涉此四六之病也吾輩作詩動有此失故每句吟味宜審語脉以煉

字法也

沈雲卿嵩山石淙前聯云行漏香爐次聯云神鼎帝壺俱壓句未岑嘉州和杜相公雲隨馬雨洗兵花迎蓋柳拂旌四言一法王右丞九成宮避暑三四衣上鏡中五六林下巖前皮日休送圓載上人紙上鋒中影邊宮裏亦與王同病王敬美嘗言其失矣作詩容易下筆不覺多有此弊其不可不用心也如孫逖和左司張員外雲間山上河邊林下府中署裏句句相犯尤甚乎

王勃披襟乘石磴列席俯春泉杜甫峽東滄江起巖排石樹圓許渾晒書秋日晚洗藥石泉清任鵠魚躍晴波動龍歸石洞腥僧貫休微月生滄海殘濤傍石城李攀龍大麓夏雲當檻出石門寒雨過城疎叟履春雲高北斗迴車秋色照鍾山石鍾並量名用假對也戴叔倫遠林生夕籟高閣起鐘聲劉長卿晚光臨仗發春光共西歸鐘鍾同仗丈通亦借聲取對也天厨禁臠云根非生下土葉不墜秋風五峰高不下萬木幾經秋以下對秋蓋夏字聲同也此不必借聲

對上下春秋固自相對覺範未之知耳

芥子園畫傳曰筆墨間俗氣尤不可侵染去俗無他法多讀書則書卷之氣上升市井之氣下降矣朱象賢印典曰古人有言唯俗不可醫人有服飾鮮華輿從絡繹而狙獫之氣令人不可耐者俗故也篆刻家諸體皆工而按之少士人氣象終非能事惟胸饒卷軸遺外勢利行墨間自然爾雅要恐賞音者希此中人語不堪爲外人道也夫繪事篆刻猶爾況於風騷之藝乎務用書籍洗滌俗腸學者其勉旃哉

崔惠童一月主人笑幾回第四字犯孤平文苑英華唐詩紀事並作人生律正意優蓋用莊子語泛歎缺陷世界而第二句相逢相值且喚杯亦兼賓主之語乃首句何必偏指主人其爲誤寫的然無疑白香山詩人生開口笑百年都幾回亦可以見矣如愛汝玉山草堂靜借問故園隱君子則句脚挾平以變調行之亦千百中之一二耳

不作奇險之語不廢尋常之言是詩家金科玉條舍布帛菽粟而好異服異味豈不甚僻乎孤穴詩人妄

好詭異務用前人未使之奇字以炫己之廣博而聳人之視聽聲調佶屈意匠恠僻風雅掃地寔詩之極弊也

詩社夜集時丁晚夏某生一聯炎蒸未改朱明節淡薄先含白露風有惡喙薄徒拊掌曰古人嘗竊此句人皆失笑蓋與漠漠水田陰陰夏木同一狡黠也昔僧惠崇詩河分岡勢斷春入燒痕新徒弟嘲其蹈襲云河今岡勢司空曙春入燒痕劉長卿不是師兄偷古句古人詩句犯師兄又魏周輔作詩上陳亞犯古

人一聯亞不作禮周輔又上絕句云無所用心唯飽食爭如窓下作新詩文章大抵多相犯剛被人言愛竊詩亞乃次韻云昔賢自是堪加罪非敢言君愛竊詩叵耐古人多意智預先偷子一聯詩皆可解顧一笑也

不妄言言卷六

夜航詩話卷之六

